

# Scuvrir il mund cun cudeschs

Project «naschè per leger»

■ (anr/fa) Bunamain in tschintgavel dals uffants che entschaivan la scola han disturbis dal cumportament linguistic. Il project «Naschè per leger» vul frenar quest svilup. «Tut ils uffants pitschens duessan avair la schanza da pudair crescer si cun cudeschs!» Questa pretaisa aveva express l'autura e publicista englaisa Wendy Cooling l'onn 1992. Tenor quel motto ha ella lantschè quel onn a Manchester l'emprim project «naschè per leger». «Sia idea ha sveglià grond interess sin tut il mund», ha ditg Anita Devonas, la responsabla dal project en Grischun, a chaschun da la conferenza da pressa ch'ella ha dà ier a Cuir ensem cun Kathrine Gerber, la presidenta da lesen.GR. Entant vegnan realisads da quests projects en Germania, Belgia, Italia, India, Canada, USA ed en auters pajais, «dapi il Di mundial dal cudesch 2008 era en Svizra».

## Promover da l'entschatta davent il svilup linguistic

Il project «Naschè per leger» Svizra vul promover tut ils uffants che naschan en Svizra, var 70 000 uffants l'onn, da l'emprim onn da vita davent: «La finamira è ch'els chattan pli tard l'access al mund dals cudeschs e da la savida», ha ditg Anita Devonas. Pops dovran sper l'amur era multifars impuls linguistics. Ma na tut ils uffants na creschan si cun las medem bunas cundiziuns: «Medis d'uffants constatan gia tar uffants fitg pitschens en lur svilup intellectual ed emoziunal differenzas marcantas», ha ella declarà, «il motiv èn ils impuls che mancan tar blers



Anita Devonas (san.), Isabel Christen cun Antonia che ha oty mais e Kathrine Gerber en la biblioteca populara a Cuir.

FOTO F. ANDRY

a chasa.» Tar bunamain 20 pertschient dals uffants constatan ins pir cur ch'els cumenzan la scolina u la scola disturbis dal cumportament linguistic. Perquai sustegnan er ils medis d'uffants quest project: «Il cudesch ha il grond avantatg, en cumparegliaziun cun la televisiun po l'uffant tscherner sez il tempo per recepir maletgs e plets», manegia p. ex. il medi Antonio Rampa da Cuir.

## Cun in flyer en plirs idioms rumantschs

Il project naziunal vegn purtà da Bibliomedia Svizra e da l'Institut svizzer giuventetgna e mediums (ISGM). En Grischun procura la societad «lesen.GR» per l'organisaziun da «Naschè per leger»: «Nossa societad che ha bundant 500 commembers s'engascha per la promozion da la lectura e per il sustegn da las

bibliotecas en chantun», ha explitgà la presidenta Kathrine Gerber, «dapi l'onn 2003 che la societad fa part da l'ISGM ans concentrain nus surtut sin la promozion da lectura per ils uffants e giuvenils.» Durant l'emprim onn da vita dals pops surdattan ils medis d'uffants u da chasa als geniturs in regal che cuntegna dus cudeschs da maletgs ed in cudesch cun impuls per ils geniturs, co ch'els pu-

dessan promover il svilup da la lingua da lur uffant. Ils cudeschs èn en tudestg, franzos e talian. «En il Grischun stat a disposiziun per ils geniturs er in feigl d'infurmaziun en rumantsch, en rg, vallader, surmiran e sursilvan», ha ella ditg. Il budget per quest project per tut la Svizra importa 600 000 francs. Ils partenaris principals èn l'Uffizi federal per cultura, la chasa editura NordSüd, medis d'uffants, bibliotecas e librerias da tut la Svizra.

## Davart il svilup da la lingua

Mesemna, il 1. d'avrigl, vegn realisada en la Biblioteca populara grischuna Arcas a Cuir in'occurrenza per geniturs dad uffants pitschens e per interessads: Il pèr Helmut Knoblauch, medi d'uffants, ed Annalies Knoblauch, logopeda, dattan in'invista en il svilup da la lingua da l'uffant pitschen sco era blers tips pratics. Ils preschents vegnan ad avair l'occurrenza da far dumondas ed era da dar in sguard en l'exposiziun da cudeschs. L'entrada è libra, i vegn dentant gavischè da s'annunziar: Tel. 081 252 61 40. Durant l'onn vegnan organisadas da questas occurrenz d'infurmaziun en tut il chantun.